

Rene Herde di AVP ta declara:

AVP lo no reconoce Urbano Lopez como Director di Departamento Huridico

ORANJESTAD (AAN): Partido AVP a tuma nota den prensa di otro nombramento politico. Si e informacion aki worde confirma, anto AVP ta duna di conoce lo siguiente: Nombramento politico di consehero di minister di husticia Urbano Lopez como director di departamento huridico lo ta otro asalto contra aparato di gobierno y contra credibilidad di gobierno.

E ta tambe otro paso mas di e partido MEP pa eherce su poder politico riba henter organizacion di gobierno y asina domina cu metanan politico partidista tur decision, tur proceso y tus aspecto di gobernacion di nos pais. AVP lo busca pa haya sa e siman aki si e nombramento aki ta berdad. En todo caso AVP ta denuncia di antemano esaki como otro acto di abuso di poder y di politisacion di aparato di gobierno. AVP ta informa di antemano cu no lo acepta e decision aki y ningun otro nombramento politico!

NOMBRAMENTO POLITICO TA INACCEPTABEL: Tur nombramento politico ta inacceptabel! Esun di sr. Urbano Lopez tambe! No solamente pasobra e no ta cumpli cu e exigencianan pa e funcion y pasobra e nombramento aki a sosode sin un procedura habri cu a exclui tur otro persona y pasobra e nombramento a bay na un forma scondi, excluyendo tur conseho of otro forma di objetividad! Tur esaki ta berdad segun Rene Herde, y e puntonan aki so caba lo mester ta mas cu suficiente motibo pa declara e nombramento aki invalido. Pero nombramento di un consehero politico, riba un base politico y no pa motibo di su capacidad profesional como hurista, den un funcion a-politico y permanente, na un forma contra tur regla y procedura democratico, ta haci e nombramento totalmente inacceptabel.


E nombramento di e consehero di minister di Husticia riba un base politico den e funcion permanente di director di Departamento Huridico, ta haci cu hende ta perde tur confianza den

conhehnan y funcionamiento di e departamento aki. Pasobra no por confia den profesionalismo, objetividad y imparcialidad di su consehnan. Conhehnan di un departamento politisa no ta worde mira como consehnan rational, objetivo, profesional y door di esey ta perde nan credibilidad.

Un director cu ta maneha su departamento a base politico partidista no ta reconoce y acepta consehnan objetivo di su trahadonan cu por ta contra e deseo politico y pa e motibo aki ta kibra credibilidad di e departamento y stroba e desaroyo profesional di su bon trahadonan.

PONE STOP NA POLITISACION DI APARATO DI GOBIERNO:

Na mas cu ocasion partido AVP a boga pa pone un fin



na politisacion di aparato di gobierno. Si wak back den historia di Aruba ta notabel cu ta netamente e partido MEP ta politisa e aparato di gobierno mas y mas cada biah cu e drenta gobierno. Ta politisa e aparata door di nombra personanan den funcionan den gobierno. No ta nombra e hendenan aki riba base di nan capacidad profesional, pero a base di nan lealtad na e partido MEP.

E personanan cu worde nombra politicamente no ta traha riba e base profesional di conocimiento y

objetividad cu ta rekekri, pero segun orden y deseo di nan lidernan politico. Ta politisa e aparato di gobierno door di decisionnan tuma riba un base politico cu metanan politico su tras. Nombramentonan politico y decisionnan politico partidista ta kibra profesionalismo di e aparato di gobierno, ta kibra credibilidad di gobierno y ta destrui un di e pilarnan di nos democracia, esta e aparato di gobierno cu mester ya imparcial y confiabel.

YAMADA URGENTE DI

AVP: Pa tur e motibonan aki y pasobra AVP y pueblo di Aruba ya no ta acepta mas atentado di MEP contra di nos democracia, ya no ta acepta e sed insaciabel pa poder di MEP cu kier domina henter e aparato di gobierno, AVP ta declara di lo no reconoce e nombramento di Urbano Lopez como director

di departamento huridico y di ningun persona cu worde nombra riba un base politico den un funcion no-politico y permanente den aparato di gobierno.

AVP ta haci un yamada na tur otro organizacion politico y sindical pa haci mescos y hunto pone un fin definitivo na tur nombramento politico den gobierno! Banda di esaki AVP lo sigui prepara regla y leynan pa haci nombramentonan politico imposibel den futuro, manera a cuminsa haci den raport CALIDAD! Y na tur ciudadano AVP ta haci un yamada pa no rebaha Bo mes y acepta un nombramento politico awor ni den futuro!

TELEFONNAN DI DIARIO

582-6747 - FAX 582-8551

KLEUR KOMT ZO!!

